



«Nossa vegliadetgna media ei 84 onns»

Las 77 soras dalla claustra dominicana da Glion fan ponderaziuns davart lur avegnir. Il cussegl general ch'ei igl organ suprem dalla cuminonza claustrala ha decidiu d'elaborar ina strategia pil futur dalla communitad. La FMR ha tematisau igl avegnir dalla claustra cun la priura generala, sora **Annemarie Müller**.



La cuminonza claustrala da Glion vegn a slargiar la porschida dalla Sentupada e sereorganisar sco communitad.

FOTO MAD

MARTIN GABRIEL/FMR

Duront 160 onns han las soras **dominicanas** giu quitaun pils auters. Ils davos 15 onns ein biaras soras seretratgas muort vegliadetgna. Pliaras soras ein mortas ils davos onns. Oz dumbra la communitad dallas soras **dominicanas** a Glion aunc 77 soras. La claustra si Quinclas, baghegiada avon biabein 50 onns, ei stada concepida per 200 soras. Entginas immobiliglias che s'udevau tier la claustra, sco l'anteriura scola da tgirunzas, han las soras vendiu ils davos onns. Il bein puril **Alber-**

tushof ei actualme in vendita. Ils proxims onns banduna la Scola mercantila Surselva la claustra. Ella claustra da Glion datti denton era secturs sco la Casa da sentupada che creschan e prosperesch.

Accumpignament, formaziun e reflexiun

La tscherca dalla Casa da sentupada (per tudestg «**Haus der Begegnung**») crescha. «Nossa finamira ei da sviluppar **vinavon** la Casa da Sentupada» di la priura gene-

rala da la claustra da Glion, sora **Annemarie Müller**. «Perquei havein nus installau ina grupp da lavur ch'ei vidlunder d'elaborar ina nova strategia dalla Casa da sentupada che duei remplazzar la strategia actuala.» Cunquei che la nova strategia vegni pér suttemassa al cussegl dalla Fundaziun dallas soras **dominicanas** da Glion, sappi ella aunc buca tradir detagls, manegia la priura generala. Entochen ussa hagi la Casa da sentupada luvrau tenor treis petgas tematicas: Accumpigna-



ment, formaziun e reflexiun.

Sora **Annemarie Müller**: «Nus sco cuminonza claustrala essan ledas d'haver iniziàu l'uniun «**Forum per la cultura da pasch**». Quella uniun organisescha dapi dus onns l'occurrenza da stad «**Ilanzer Sommer**». Quella occurrenza da stad ha

«Nus stuein planisar nies avegnir e metter sin pupi co nus vulein far tgei e cura.»

Sora **Annemarie Müller**, priura generala dalla claustra da Glion

tenor sora **Annemarie Müller** era liug uonn puspei igl uost. Ed insumma di la priura generala: «La Casa da sentupada duei esser in liug da scuntrada per la pasch ed in liug da sentupada denter las soras e la populaziun d'ordeifer la claustra.»

Strategia cumplessiva necessaria

La priura generala, sora **Annemarie Müller** manegia, ch'ei seigi inevitabel per la cuminonza claustrala d'elaborar ina strategia cumplessiva. «Tier quella conclusi-

un vegnin nus pli ditg e pli fetg era en connex cun la damonda digl avegnir da nossas localitads dalla scola mercantila Surselva. Nus stuein planisar nies avegnir e codificar co nus vulein far tgei e cura.» Tier las localitads da scola seigi clar che quella sesvidien ils proxims onns cura che la Scola mercantila midi domicil. Mintga pass strategic en in cantun dalla claustra hagi consequenzas per in auter cantun.

Per la cuminonza claustrala seigi ei perquei grev da planisar igl avegnir dallas localitads da scola, perquei ch'ins sappi buca tgei che succedi cul rest dall'immobilia claustrala, di sora **Annemarie Müller**. «E nus savein buca discuorer cun eventuals interessents per las localitads da scola, avon che nus savein buca tgei che schabegia cun las ulteriuras localitads dalla claustra a cuorta vesta ni a vesta me-sauna.»

Encurir novas vias

Cert ei che la cuminonza da las soras daventa pli pintga. Sora **Annemarie Müller** ei la giuvna sora dominicana en la cuminonza. Per ella seigi impurtont da rispunder era damondas sco per exempel, co, nua e per tgei scopos che nus sco soras vu-

lein viver egl avegnir. «Quellas rispostas ston vegnir dadas ussa e buca pér en 10 ni 20 onns» conferma la priura generala. «Nossa media da vegliadetgna ei 84 onns, quei vul dir che nus essan mo paucas soras ch'ei sut 75 onns.» Per l'entira reorganisaziun gioghien secapescha era las finanzas ina rolla fetg impurtanta. Sora **Annemarie Müller** menziunescha era che la cuminonza claustrala hagi neginas novas entradas da soras en claustra. «Aschia ch'igl ei da quintar ch'il diember sereducescha sin 50 soras e pli paucas ils proxims onns.

Viadi el Taiwan

En paucs dis viagescha sora **Annemarie Müller** el Taiwan per far ina viseta da duas jamnas a las otg consoras che vivan leu. «Era las soras el Taiwan han 80 onns e dapi. Sora **Annemarie Müller** di che las soras dil Taiwan vegnien el decuors dil 2023 a midar domicil en ina habitaziun affiliada ad ina casa da tgira che vegni era gestiunada da soras **dominicanas**. «Mia incumbensa las proximas jamnas el Taiwan ei denter auter d'accumpignar las consoras per quella gronda midada da domicil e da sclarir tgei che nus vulein far cun l'anteriura sedia dil convent.»